

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq saqqummiupparput:

Timmisartuutileqatigiit amerlanerusut pitsaanerusumik pisortat pigisaannut timmisartunut inilianut sullivinnullu aningaasaliinikkut mittarfeqarfitsinni pitsaanerusumik periararfissaqalernissaannik Naalakkersuisut sulissuteqarnissaannik peqquneqarnissaannut Inatsisartut aalajangiiffigisassaattut siunnersuut.

(Inatsisartut Sanaartornermut ataatsimiititaliaat isumaqatigiittoq tamarmiusorlu, ukunannga inuttalik: Inatsisartunut ilaasortat Karl Kristian Kruse Siumut, Nikolaj Jeremiassen Siumut, Anders Olsen Siumut Aqqaluaq B Egede Inuit Ataqtigiit, aamma Kalistat Lund, Inuit Ataqtigiit).

Tungavilersuut:

Naammaginarumik akuttussusilimmik naammagisimaarnartumillu akikitsumik, eqaatsumik sunniuteqarluartumillu angallassinermik periarfissiinissamut mittarfiit atorneqassapput.

Mittarfinnili unammillerfioqisuni namminersortut timmisartunut inilianik sullivinnillu piginnittuermikkut inatsisitigut kisermaassisussaataitaasutut timmisartuussinermik ingerlatsipput. Tamanna siunnersuutikkut aqqinniarneqarpoq.

2009-mi Unammilerneq pillugu nassuiaammut atatillugu Unammilleqatigiinnermut ataatsimiititaliap Kalaallit Nunaanni silaannakkut angallannermi unammilleqatigiinnerup siuarsarnissaanut periarfissat suliarai. Unammileqatigiinneq pillugu Nakkutilliisoqarfiup misissuinerata Kalaallit Nunaanni silaannakkut angallassinermi unammillernerup siuarsarneqarsinnaaneraniq periarfissat takutippai, tungaviusunilu arlalinni erseqqissarneqarpoq niuernermi teknikikkut akornutaasinnaasut peerneqarnissaat.

Namminersorlutik Oqartussat malittarisassani tigussaasunik allannguinerisigut ingerlatseqatigiiffinnut nutaanut ajornannginnerusumik aallartittoqarsinnaaneraniq Unammileqatigiinneq pillugu Nakkutilliisoqarfimmit periarfissaqartoqarneraniq Sanaartornermut ataatsimiititaliaq isumaqataavoq. Allanguisinnaanermut ilaatigut ilaatinneqarput mittarfinni periarfissinneqarsinnaanermut pissutsit.

Quleqquttami “Mittarfinnut isersinnaanerit” Unammilleqatigiinneq pillugu Nakkutilliisut siunnersuuteqarput: “Namminersorlutik Oqartussat kalaallit nunaanni mittarfeqarfinnut aningaasaliinissamut aalajangiinerni unammilleqatigiinnermut periarfissat ilanngutissagaat.

Siullermik Namminersorlutik Oqartussat aqquutit niuerutit aqquutillu kiffartuussinissamik isumaqatigiissuteqarnikkut timmisartuussiffiusut unammilliutigineqarnissaat salliutissinnaavaat. Timmisartuussisartunut nutaanut hangarinut mittarfeqarfinnilu atortunut allanut isersinnaanerit pitsaanerusumik periarfissiissutigippatigit.

Nunani allani misissuinerit tikkuarpaat, timmisartuussisartut nutaat amerlanerulernissaat kigaallatsinneqarajuttartoq matuminnga, tassalu timmisartuussisartut piusut mittarfeqarfinni atortut pitsaanerpaat ingiaassutigereersimasarmatigit atortunut piusunut isersinnaannginnermut pissutaagajuttarpoq aqquutit nutaat iserfiginissaannut timmisartuussisartut nutaat angisuumik amerlasuutigullu immikkoortulersussanik aningaasaliisariaqartarmata.

Misissuinerit erseqqissarpaat timmisartuussisartut nutaat ilaatinneqarniassappata arlalinnik suliniuteqartoqartariaqartoq, soorlu aningaasaliisariaqarnermik annikillerissutaasussanik imaluunniit aningaasaliinissat piumasarineranani ajunaarutaasinnaasunik ikilisaataasussanik. Assersuutigalugu suliniut unaasinnaavoq tassalu atortut pisariallit mittarfeqarfiup pigissagai imaluunniit atortut attartornissaat mittarfeqarfiup neqeroorutigissagai mittarfeqarfimmik atuisumut timmisartuussisartunulluunniit.“

Mittarfeqarfinni atortulersuutit pisortanit pigineqartut aqutitigalugit annertunerusumik unammilleqatigiinnerup ammaaneqarnissaa kissaatigaarput. Mittarfeqarfinni atortulersuutit pisortanit pigineqartut tamatuma kinguneranik timmisartuutiqatigiinnut mittarfinnik atuinissamut kissateqartunut attartortinneqartassapput. Taamaalillutik unammilleqatigiinnerup annertusinissaanut niuernermit teknikikkut akornutaasut peerneqassapput.

Kisiannili sumiiffinni inuttaqassutsimikkut niuernermit aningaasaliinissamut tunngavissaqarluartut naatsorsuutigineqartuni pisortat mittarfinni atortulersuutitut kisimik aningaasaliissarnissaat pingaaruteqarpoq.

Unammilleqatigiinnermut pisaanerusunik tunngavissat pilersinnerisigut ilaassutissat akikinnerusut sapaatillu akunneranut aallartarnerit amerlanerusut periarfissaalissapput.

Siunnersuut atortulersuutit nutaanik pilersitsinikkut imaluunniit atortulersuutit namminersortunik pigineqareersunik pissarsiniarnikkut timitalerneqarsinnaavoq.

Siunnersuutit pisortanut aningaasatigut allaffissornikkullu sunniutissai

Aningaasanut inatsisit atorlugit sanaartornermit akissaajaateqartoqarnissaa naatsorsuutigineqassaaq. Sanaartornermit aningaasaliinernut matussutissat atuinernup annertunerulerneratigut taamaalillunilu Mittarfeqarfiit attartornermit isertitaasa qaffannerisigut atortulersuutit piunerisa sivissussusaannut naleqqiullugu sanaartornermit aningaasaliinissat imminut akilersinnaasutut naatsorsuutigineqarput.

Ilanngullugulu naatsorsuutigineqarpoq ilaasunik napparsimasunillu angallassinermi inuiaqatigiit aningaasartuutaasa ataatsimoortut ikilinissaat, tamannalu ingerlatsinermi ataatsimut akissaajaatinut annertuumik sipaaruteqartitsissaaq.

Inuussutissarsiutinik namminerisaminnik ingerlataqartunut aningaasatigut allaffissornikkullu sunniutissat

Niuernermit teknikikkut akornutaasut peerneqarnerisigut unammillernernut tunngavissanik pitsaanerusunik pilersitsisoqassaaq, timmisartuussisartullu nutaat amerlanerusut isumaqatigiissutinut taamatullu timmisartuussisarnernut nalinginnaasunut sullissinermit neqerooruteqartarnissaat naatsorsuutigineqartariaqarpoq.

Ilanngullugulu naatsorsuutigineqartariaqarpoq, angallassisartuusinnaasunut aningaasatigut pissarsiassat siunissami ikinnerunissaat, soorluttaaq naatsorsuutigineqartariaqartoq pineqartumi tapiissuteqatigiittarneq annikilliumaassasoq.

Siunnersuutit innuttaasunut aningaasatigut allaffissornikkullu sunniutissai

Siunnersuut piviusunngortinneqarpat timmisartuussinerlu unammilluutiqineqalerpat, timmisartuussinermit akuttussutsit pitsaanerulernissaat naatsorsuutigineqarpoq kiisalu angalasunut akikinnerulerlutik.